



კენჭისყრის დღეს კენჭისყრის შენობაში ფოტო-ვიდეო გადაღების შემზღუდველი ცესკოს დადგენილება უნდა გაუქმდეს

2012 წლის 24 სექტემბერს საქართველოს ცენტრალურმა საარჩევნო კომისიამ მიიღო დადგენილება, რომელიც განსაზღვრავს არჩევნების დღეს საარჩევნო უბნებზე ფოტო-ვიდეო გადაღების წარმოების წესს. დადგენილება აწესებს საარჩევნო უბნებზე ფოტო-ვიდეო გადაღების ისეთ შემზღუდველ რეგორიცაა:

-იმ შემთხვევაში თუ კენჭისყრის შენობაში ყოფნის უფლების მქონე პირი კამერით გადაადგილდება ან ტოვებს კენჭისყრის შენობას, კარგავს კენჭისყრის შენობაში განმეორებით შესვლისა და ფოტო-ვიდეო გადაღების წარმოების უფლებას.

-საარჩევნო უბნის გახსნამდე, დილის 7-დან 8 საათამდე და ხმების დათვლის პერიოდში ფოტო-ვიდეო გადაღება უნდა წარმოებდეს კომისიის თავმჯდომარის მიერ გამოყოფილი სპეციალური ადგილიდან;

-გადაღება უნდა წარმოებდეს ნებისმიერი სუბიექტიდან ან ობიექტიდან 3 მეტრით დაშორებული მანძილიდან;

-ხმის მიცემისათვის განკუთვნილი მთელი დროის განმავლობაში პრესისა და მასობრივი ინფორმაციის სხვა საშუალებამ ფოტო-ვიდეო გადაღება შეიძლება აწარმოოს არაუმეტეს 10 წუთისა. 10 წუთზე მეტი ხნით გადაღების მსურველმა გადაღება შეიძლება აწარმოოს ხოლოდ ამისათვის სპეციალურად გამოყოფილი ადგილიდან;

არასამთავრობო ორგანიზაციები და მედიის წარმომადგენლები დადგენილების მიღების დღიდან მოყოლებული მოითხოვენ მის გაუქმებას ვინაიდან დადგენილება მნიშვნელოვნად ზღუდავს და აფერხებს არჩევნების მიმდინარეობის დღეს საარჩევნო პროცესის შესახებ

ინფორმაციის მოპოვებას. თუმცა, საქართველოს ცენტრალურ საარჩევნო კომისიას დღემდე არ მიუღია დადგენილების გაუქმების გადაწყვეტილება. ცესკოს განმარტებით, განიხილება დადგენილებაში ცვლილებების განხორციელების საკითხი.

2013 წლის 15 ოქტომბერს კოალიციის „მედიის ადვოკატირებისთვის“ და კოალიციის „არჩევანის თავისუფლებისთვის“ წარმომადგენლები შევხვდით ცენტრალური საარჩევნო კომისიის თავმჯდომარეს და წარვუდგინეთ კოალიციებში შემავალი არასამთავრობო ორგანიზაციების მიერ შემუშავებული ალტერნატიული წინადადება კენჭისყრის დღეს კენჭისყრის შენობაში ფოტო-ვიდეო გადაღების წარმოების მოსაზრებებზე. წინადადება ითვალისწინებს დადგენილებაში იმგვარი ცვლილებების შეტანას, რომლებიც საშუალებას მისცემს მედიის წარმომადგენლებს შეუფერხებლად გადაიღონ კენჭისყრის დღის მათთვის საინტერესო მოვლენები და ამავდროულად უზრუნველყოფს საარჩევნო პროცესის შეუფერხებლად წარმართვას. ალტერნატიულ წინადადებაზე მუშაობისას გათვალისწინებულ იქნა ყველა ის დაბრკოლება, რომლებიც მედიის წარმომადგენლებს შეეძენათ გასული წლის საპარლამენტო არჩევნების გაშუქებისას და რომელთა აღმოფხვრა აუცილებელია საარჩევნო პროცესის სრულყოფილად გასაშუქებლად. ასევე, მხედველობაში იქნა მიღებული საარჩევნო ადმინისტრაციების შეფერხების გარეშე მუშაობის უზრუნველყოფის საჭიროება.

კიდევ ერთხელ მოვუწოდებთ ცესკოს გააუქმოს ან ჩვენს მიერ წარდგენილი წინადადებების შესაბამისად შეცვალოს ზემოაღნიშნული დადგენილება. საქართველოს საარჩევნო კოდექსით ისედაც არის დარეგულირებული კენჭისყრის დღეს კენჭისყრის შენობაში ყოფნის უფლების მქონე პირთა უფლება-მოვალეობანი და დამატებითი შეზღუდვების არსებობით მედიას ხელი შეეშლება უმნიშვნელოვანესი ფუნქციის განხორციელებაში.